

ciendæ negotium Senatui permittere ; ab eo , quod illi visum fuisset , non recessurum . Eadem quoque in Albano Duce in pacem propensio noscebatur . Cosmus quoque Florentiæ Dux , ut bello finis imponeretur , laborabat ; ob id officiis , & auctoritate , quammaxime posset , in eam rem incumbere Senatui hortabatur , idque eo vehementius , quod nuper Senarum urbe beneficiario jure a Philippo accepta (quod Patribus per Petrum Pandulphinum legatum significaverat) bellum a finibus procul arcere suis conducere rebus arbitraretur .

Verum cuncta irrito conatu cesserant ; neque ab armis , nisi necessitate impellente , descendendum fore plerique censebant . Nam Guisus jam se Romam prope intulerat ; atque Albanus Dux , Marco Antonio Columna cum Hispanis , ac Germanis militibus ad Palianum oppugnandum præmissis , cum reliquis copiis in Latium non sine totius urbis , ac Romani populi metu , & terrore subsequeretur , ut prælio discernendum fama percresceret . Iisdem ferme diebus , cum ex lege , qua Romanis a Pontificibus regnum Neapolitanum Carolus Cæsar acceperat , divi Petri Apostoli festo die septem aureorum millia , atque albatem equam quotannis Philippum exhibere Ecclesiæ oporteret , oblatamque pensionem Paulus recipere noluisse , Franciscus Vargas , ne quidpiam de sui Regis jure , quantum in se esset , imminui sineret , Triultium , Pauli legatum (quem Venetiis id muneris obeuntem Cardinalatus honore insigniverat) adire , Regisque nomine solvere statuit ; si Triultius renuisset , obnuntiatione usus . Scriba itaque adsumpto , ad ædes Triultii accedit , quæ statuerat exequi conatur . Triultius in scribam verbis acriter invehitur ; minas intentat : ad Principem , & Patres profectus Vargæ factum detestatur ; plecti scribam flagitat . Vargas de probris , ac contumeliis a Triultio in eundem scribam congestis conqueritur ; utrinque irarum æstu animi feruntur . Senatus rem omnem uti acciderat per Naugerium Pontifici deferendam curavit .

Dum hæc geruntur , Philippus bellum adversus Gallos in Morinis molitur . Philibertum Allobrogum Principem cum prævalido exercitu in hostium fines impetum facere jubet , qui

1557
Sene beneficiario jure a Philippo Florentiæ Duci concessa .

Marcus Antonius Columna ad Palianum oppugnandum ab Albano Duce missus .

Albanus Dux exercitum in Latium ducit .

Paulus Pont. oblatam ab Hispanis de Neapolitano regno pensionem recipere recusat .

Philibertus Allobrogum Dux Sancti Quintini oppidum aggreditur .